

**Date – 04/12/2025**

**Time - 18:30 -18:40Hrs**

**AKASHVANI AIZAWL**  
**REGIONAL NEWS BULLETIN**  
**HEADLINES ( EVENING )**

1. Mizoram Larsap hlui Swaraj Kaushal chu vawiin khan New Delhi ah kum 73 mi niin a thi.
2. Chief Minister Pu Lalduhoma'n sawrkarin hmeichhiate venhimna leh chawikan kawngah theihtawp a chhuah a ti.
3. Sorkar kum kal mekah April atanga November, thla 8 chhungin Taxation department chuan kawng hrang hrang atangin chhiah cheng nuai 86,523 a hmu tawh.
4. Russian President Vladimir Putin chuan vawiin tlai khan ni hnih cham turin New Delhi a lo thleng.

<><><>

**FORMER MIZO GUV DEMISE**

Mizoram Larsap hlui Swaraj Kaushal chu vawiin khan New Delhi ah kum 73 mi niin a thi.

Swaraj Kaushal hi vawiin tlai khan a awmna atih thu sawiin rang takin AIIMS pan pui ni mahse, an thlen chuan Doctor ten a thih thu an sawi a, amah he Senior Advocate a ni bawk.

Swaraj Kaushal hi Kum 1990 February ni 8 khan Mizoram Governor atan lakluh a ni a, kum 1993 February ni 9 thleng Mizoram Governor nihna a chelh a, Mizoram Governor atana lakluh anih hian kum 37 mi niin India rama Governor naupang ber a ni.

Prime Minister Narendra Modi chuan Mizoram Larsap hlui Swaraj Kaushal chu a ui thu sawiin a dan hriatna hmang tangkaiin khawtlang nun siamthat kawngah nasa takin hna a thawk thin a ti a, India Governor zinga naupang ber anih bakah Mizoram hmasawn nan nasa takin hna alo thawk tawh thin a ti a, Parliament lamah pawh sulhnu ropui tak a nei tih sawiin a kalsan tak a chhungte a tawrhpuoi tak zet thu a sawi bawk.

Larsap General (Rtd) Vijay Kumar Singh pawhin Mizoram Larsap hlui Swaraj Kaushal a ui thu sawiin Mizo mipuiten a thihna chu an tuar takzet a ti a, a hnathawh that te an hre reng dawn tih sawiin a kalsan chhungte a tawrhpuh takzet a ti bawk.

Chief Minister Pu Lalduhoma pawhin Mizoram Larsap hlui Swaraj Kaushal a ui thu sawiin khawtlang nun siamthat kawnga a hnathawh an hre reng dawn a ti a, zah takin Mizo mipuite an thlah tih sawiin a kalsan tak a chhungte an tawrhpuh thu a sawi a ni.

**(Desk)**

<><><>

## **RODENT**

Kumina Thingtam lo thlengah Mizoram district 11-a kuthnathawktu chhungkua 5,317-te buh leh bal leh thlai thar tur beisei atanga za zela 42 point 06 chu sazu puangin an seh chhiatsak a; Mizoram sorkara Disaster Management & Rehabilitation department hnenah Agriculture & Farmers Welfare department chuan Thingtam vanga sazu puang hi State Specific Disaster-ah puang turin an ngen a, mahse, State Specific Disaster a puan kher ngai loin State Disaster Respond Fund hnuai norms awmsa atangin sazu puang tuartu loneitute hnenah tanpuina pek a ni dawn.

Disaster Management & Rehabilitation department hotute hnen atanga Akashvani News, Aizawl thudawn danin, rawthing tamin a hrin sazu puang vanga loneitute harsatna tawh hi Agriculture department chuan State Specific Disaster a puang turin an ngen a, Amaherawhchu sazu puangin loneitute buh leh thlai a khawihchhiat vanga tanpuina pek tur hi State Specific Disaster-a puan kher ngai loin SDRF Norms-a pest attack hnuai tanpuina hi pek theih a nih thu an sawi a; sazu puang tuartu loneitute hi DC-ah an report a, verification tih a nih chuan pek theihsa a nih thu leh hmalak zel dan tur chu sorkar hotuten an ruahman dawn thu an sawi.

***Voicecast***

**(Corr : Johny)**

<><><>

## **CM**

Chief Minister Pu Lalduhoma'n sawrkarin hmeichhiate venhimna leh chawikan kawngah theihtawp a chhuah a ti a, hmeichhiate hmasawna tur hmasawna ruhrel hrang hrang a ding chho mek tih a sawi.

Vawiin khan Aizawl Sumtual, MINECO ah Mission Shakti hnuai State Hub for Empowerment of Women (SHEW), Women & Child Development Department te buatsaih-in Chief Minister Pu Lalduhoma leh hmeichhe zirlai naupangte inkawmna hun "Meet Your CM With Adolescent Girls: A Celebratory Plantation of Trees under BBBP" buatsaih a ni a, he hunah hian Chief Minister Pu Lalduhoma chuan sawrkarin hmeichhiate venhimna leh chawikanna kawngah theihtawp a chhuah tih sawiin hmeichhe hmasawna tur hrang hrangah ruahmanna a siam a ti a, an sawrkarah hmeichhia ten hma an sawn tih sawiin kawng hrang hrangah hotu lu an ni chho zel tih a sawi bawk.

Minister Pi Lalrinpuii pawhin thu sawiin Hmeichhiate humhimna leh chhawmdawlna Scheme hrang hrang awm te hrechiang duh tan engtik lai pawh in 181 (toll-free) ah a call thin theih reng thu a sawi a, hmeichhe dinhmun chawikan nan theih tawp an chhuah zel dawn a ti bawk.

Chief Minister hi naupangte nena inkawmin, an zawhna hrang hrangte a chhansak bakah a fuih a, He inkawmnaah hian St Paul’s Higher Secondary School, Govt JL High School, Govt. Chawnpui High School, Neuhof English Medium School leh Mount Carmel School atang tein zirlai hmeichhe tleirawl thlanchhuah te an tel a ni.

**(DIPR)**



**PHE MINISTER**

PHE Department chuan vawiin khan Tui Pût (Leak) Report-na App hmang tha zual mi 3 hnenah lawmman an pe a; tui pût report-na app hi nikum September thla atanga hman tan niin, vawiin thlengin tui pût report 350 a awm tawh.

Lawmman semna hmanpuitu Khuallian PHE Minister Prof. Lalnilawma chuan, kum 1 vel chhunga PHE tui pipe atanga tui pût report 350 a awm chu lawmawm atih thu sawiin mipuiin sorkar an thawhpui that vang a nih thu a sawi a, app hmang kher loa tawngka leh message kaltlanga report an dawn nual thu leh tui pût siamtha turin rang taka hma an lak zel thu a sawi.

**(Byte)**

Tui pût report-na app kaltlanga report an dawnte chu PHE tui pipe atanga tui pût a nih vek loh thu Prof. Lalnilawma chuan a sawi a, report lut zinga 47 chu PHE tui pipe ni lo, cluster atanga mimal tui connection a nih thu sawiin, hengah pawh hian connection neitute an hrilh nghal zel thu leh an siamtha tura an ngaih thu a sawi.

Prof. Lalnilawma chuan kawng hrang hranga PHE in harsatna a neihte media kaltlanga mipuia an puanna kaltlangin mipuiin department harsatna te an hriatthiampui thin tih sawiin tui pur report tute chu tui pût vanga mipuia tui indaih lohna thleng thei hriaa thahnem an ngaih vang a nih thu a sawi a; mipuite chu mahni chhehvelah tui pût a awm em tih thlithlaia, tui pût a awm chuan report zel turin khawtlang hruaitute leh mipui a sawm nghal a ni.

Tui pût report-na app hmang tha lawmman dawngtute chu - Pu PB Lalkrosmawia, Tanhril, Pu F Lalhmangaiha, Chanmari leh Pu RK Nithanga Chanmari Aizawl te an ni.

**(Corr : Johnny)**



## TAXATION DEPARTMENT

Sorkar kum kal mekah April atanga November, thla 8 chhungin Taxation department chuan kawng hrang hrang atangin chhiah cheng nuai 86,523 a hmu tawh a; thla liamta November khan cheng nuai 7,909 a hmu.

Taxation department-in Mizorama chhiah hmuh zat (monthly/annual achievement)-a tarlan danin, kumin April - November thla chhung khan kawng hrang hrang atangin chhiah cheng 86,523 hmuh a ni a; Goods & Services Tax (GST) atangin cheng nuai 7,279 hmuh niin, chhiah hmuhna tam ber a ni a, GST atanga chhiah hmuh hi Taxation department-in chhiah a hmuh zawng zawng atangin za zela 90 point 3 a tling a ni.

November thlaah hian GST dawta chhiah hmuh tamna ber chu Sales Tax niin, cheng nuai 325 hmuh a ni a, a dawttu Profession Tax atangin cheng nuai 117 hmuh a ni.

Petrol leh diesel atanga sorkarin chhiah chi hnih a lakna Road Maintenance Cess leh Social Infrastructure & Services Cess atangin cheng nuai 93 ve ve hmuh a nih bakah Entertainment Tax atangin Rs 10,000 hmuh a ni bawk.

Sorkar kum kal meka thla 8 chhung hian GST atangin cheng nuai 61,599 hmuh ni tawh a tam ber a; Sales Tax atangin nuai 16,962, Profession Tax atangin nuai 1,313, Road Maintenance Cess leh Social Infrastructure & Services Cess atangin cheng nuai 3,323 ve ve bakah, Entertainment Tax atangin Rs 50,000 hmuh a ni tawh a ni.

**(Corr : Johny)**

<><><>

## AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

## LUNGLEI ASF

Lunglei District AH & Vety Deparment chuan kum 2024 chhunga ASF avanga Vawk thite zangna dawmna Rs. 47,52,000 (Cheng Nuai sawmli pasarih, sing nga sang hnih) chu ASF tuartu chhungkua 599 te hnenah a pe chhuak.

Lunglei District chhunga zangnadawmna vawiina pek chhuahah hian Vawk thi 1188 te tana pek chhuah a ni a, instalmet 3 a pek chhuah niin a hnunung ber hi a dawngtu turte Bank account ah Ni 2 December, 2025 khan thun fel a ni.

African Swine Fever (ASF) hi Mizoram State Disaster Management Authority chuan kum 2024 chhung atan State Specific Disaster-ah a puan avangin kum 2024 chhunga ASF avanga Vawk thite chu State Disaster Response Fund (SDRF) atangin chhawmdawlina pek theih a ni. Chhawmdawlina hnuaiah hian Vawk thi 1 tan Rs.

4000 (cheng sang li) zel pek theih ani a, chhungkaw 1 in Vawk thi 6 thleng chhawmdawlna an dawng thei a ni.

**(Thangmingliana Renthlei PTC Lunglei)**



## **NATIONAL QUIZ COMPETITION**

Food4Thought Foundation leh Monocept ten an buatsaih ram puma School zirlai naupang pual quiz competition Reading Decathlon Final nakum January ni 17-a neih turah Mizoram atangin Mount Carmel School, Chaltlang leh La Montessori School, Mission Veng te chu thlan an ni.

First Round hi kumin August 22 khan MYC hmalaknain Online mode hmangin MYC conference room-ah buatsaih a ni a. Hetah hian School pali an tel a. He round-ah hian hmarchhak bial aiawh tur thlan an ni a. North East aiawh tur hian Mount Carmel School leh La Montessori te hi thlan an ni ta a ni. Kumin November ni 29-a Madhya Pradesh khawpui Indore a neih Regional Round paltlang lehin nakum January ni 17-a National Round intihsiakna hmachhawn turin Mount Carmel School leh La Montessori School te hi an inbuatsaih a ni.

Regional Round Indore, Madhya Pradesh kalna senso hi MYC chuan sum leh pai a tumsak bakah MYC office-ah MYC Chairman Pu Malsawmzuala Ralte chuan kawmin inelna lian tham India ram pum huap Quiz competition a final round thleng thei school an nei chu an chhuan thu sawiin theihtawp chhuah turin a chah a ni.

**(DIPR)**



## **RUSSIA PRESIDENT**

Russian President Vladimir Putin chuan vawiin tlai khan ni cham turin New Delhi a lo thleng. A cham chhungini India-Russia Annual Summit ah a tel dawn a. Prime Minister Narendra Modia nen an inkawm dawn bawk a ni. Hruaitu pahnihte hian an chhehvel leh khawvel pum thil thleng pawimawh tak takte an sawidun dawn a. Hei bakah hian inremna engemawzat ziah beisei a ni a. Sumdawna lamte, eibar zawnnate, healthcare, academics, culture leh media lamahte thawhdunna tur inremna ziah beisei a ni. President Draupadi Murmu-i chuan Russian President hi zanriah alo buatsaih sak dawn a ni.

**(Newsonair)**

